

ESSOLITO "25 AÑA" PABIEN:

1952.....1977

Mas cu un decada pasa, den añanan 1950, e refinaria na San Nicolas tabata progresá, treciendo mas y mas tata y nan famia pa nos isla. Aunque e poblacion di San Nicolas y vecindario anto tabata expande, e posibilidad pa recreacion no a worde aumenta. Un di e personanan cu tabata consciente di esaki, y cu a hasi algo pa soluciona e falta di recreacion, tabata Sr. Gerard Schouten, lantando ESSOLITO, e club pa juventud di Aruba.



MR. GERARD SCHOUTEN

E energetico Sr. Schouten a logra obtene un pida tereno na Juana Morto, locual lastimamente no tin mag di worde usa pa e intencion di traha un edificio di club ariba dje. Sr. Manuel Viana e ora ey a regala parti di su "golf course", incluyendo e asina yama "golf-house", situa ariba e terreno aki, na Cura Cabay. Como cu e casita no tabata den un estado adecuado pa worde usa mesora como edificio di club, Sr. Schouten y un grupo di personanan entusiasmo a cuminsa bishita varios comerciantenan y otro personanan, pidiendo nan di regala loke nan kier a regala.

Asina, e organisadornan di e club pa juventud di Aruba a logra obtene verf, material pa construccion y otro necesidadnan y trabaonan por a cuminsa. Na principio e club tabata consisti di solamente 15 mucha, pero despues di algun luna e cantidad aki a aumenta pa 400. Naturalmente nan no tabata tin cen pa paga, pero si contribucion di e muchanan tabata worde pidi den forma di bon conducto, mientras cu nan mester a tene e club limpi nan mes tambe.

Como padrino di e club a worde nombra: J.J. Horrigan, kende e tempo tabata presidente di Lago. For di e tempo ey, tur presidente di Lago, a tene



MR. MANUEL VIANA

e posicion di padrino di ESSOLITO, kier meen: actualmente James Ballenger ta presidente di e club pa juventud di Aruba. E club despues a obtene un refrigeradora, regalo di Lago, electricidad gratis, cortesia di ELMAR, y otro compania a obsequia un televisor.

E muchanan por recrea hungando ping-pong, junior billiards, y otro weganan, cual tur a worde obtene gracias na e esfuersonan incansable di Sr. Gerard Schouten.

Sr. Schouten tambe a muestra su preocupacion encuan to di e tardanza di e proyecto Centro di Bario Brasil, y ta dispuesto pa duna un man pa asina juda cu e proyecto aki.

